



Ailibala Preya Sebis

Ailibala Preya Sebis

*Langa dijan sebis, if det redwan raiting tok 'lida', wal eni tjetj
lida gin dum. Wen pris jidan deya, maitbi im gin yusum det
komyunyan sebis.*

MAJURRUMAP PIPUL BLANGA GOD

1. *Det lida garra tok 'gudei' langa ola pipul, en prei basdam.*

2. *Det lida garra tok basdam, en ebribodi tok afta.*

Jisas Kraiss, det Bos, im iya garram wi.

Yuwai, im iya garram wi.

Oni langa Istataim:

Kraiss bin gidap laibala.

Trubala! Imbin gidap laibala.

Wal det nait, imbin binij na,

en wi nomo sabi wanim garra hepin tudei.

**Melabat garra weship im
garram wanbala hat en main.**

3. *Det lida garra ridimat wanbala wed brom dislot.*

*O, maitbi det lida gin pikimat najawan Baibul bes,
laik wanbala brom dislot: Romans 5:5; Rebaleishan
5:12; Rebaleishan 15:3-4; Hibrus 13:15; Saam 66:1-3.*



Langa Fes Pida 1:3 im tok,

Wal wi garra gibit theingsks langa God det Dedi blanga Jisas Kraiss det Bos blanga wi, dumaji imbin brabli kain langa wi, en imbin gibit wi nyubala laif wen imbin meigim Jisas Kraiss gidap laibala brom dedbala.

Langa Saam 96:2-3 im tok,

Sing langa Yawei en preisim im. Dalimbat det gudnyus ebridei weya imbin seibum wi. Dalimbat pipul langa ebri kantri im brabli haibalawan, en dalimbat olabat blanga ola haibala ting imbin dumbat.

Langa Jon 4:24 im tok,

En wi Dedi lukabat detkain pipul hu weship im brabliwei garram olabat spirit trubalawei, dumaji God im Spirit, en detlot pipul hu weship im garra weship im brabli- wei garram olabat spirit trubalawei.

4. *Sing sambala song blanga preisim God.* 🎵🎵🎵

TOK SORI LANGA GOD

5. *Det lida garra ridimat dijan wed brom Baibul.*

O, maitbi det lida gin yusum najawan bes brom dislot: Denyul 9:9-10; Luk 15:18-19; Eks 17:30-31.



Langa Fes Jon im tok,

Wal if wi reken wi nomo bin dum eni nogudbala ting, wal wi dalimbat laiya langa wi ronselp, en det trubala wed nomo jidan langa wi.

Bat God im oldei jidan trubala,

en im oldei gibit wi feyago,

en if wi onap langa im blanga ol detlot nogudbala ting weya wi dumbat,

wal im garra larramgo wi fri.

(Fes Jon 1:8-9a)

Maitbi abum lil kwait taim wulijim pipul gin jinggabat.

6. Det lida garra tok:

Wal, wi garra onap blanga ol detlot nogudbala ting weya wibin dum, en wi garra sori miselp langa Dedi God.

Afta ebri preya, wi ol tok mijamet:

Yuwai, melabat sori miselp langa yu Dedi God.

Dedi God,
melabat gibit theingks langa yu,
dumaji yu laigim melabat brabliwei
en yubin jandim yu ronwan san, Jisas,
hubin dai blanga melabat.

Yubin meigim melabat klebawan blanga
jinggabat yu brabliwei
en blanga sabi dijan wel gudwei.
Bat seimtaim melabat nomo laigim yu
o jinggabat yu,
en dijan meigim yu nogudbinji.



Yuwai, melabat sori miselp langa yu Dedi God.

Dedi God,
yubin gibit langa melabat maus,
blanga tok ola gudbala ting
weya yubin dum.



Bat seimtaim melabat nomo tok gudwei.

Yuwai, melabat sori miselp langa yu Dedi God.

Dedi God,
 yubin gibit melabat bingga
 blanga dum ola gudbala wek,
 en blanga album najalot pipul,
 en blanga lukaftumbat dijan kantri gudwei.
 Bat seimtaim melabat nomo jidan gudwei.



Yuwai, melabat sori miselp langa yu Dedi God.

Dedi God,
 yubin irrim melabat preya,
 en melabat askim yu blanga
 larramgo melabat fri brom melabat nogudbalawei.
 Album melabat jidan brabliwei langa Jisas neim.
Amin.

7. *Det lida garra tok:*

Langa Hibrus im tok,
 Jisas gin oldei seibum enibodi hu wandim
 kaman langa God thru im, dumaji im jidan
 laibala olagijawan, en im gin oldei askimbat
 God blanga olabat.



(Hibrus 7:25)

EBRIBODI TOK GUDBINJIWEI

8. *Ebribodi garra jandap blanga tok gudbinjiwei:*

Wi na det bodi blanga Krais!
Im Holi Spirit jidan garram wi!

Gibit theingks langa Yawei,
dumaji im na brabli gudbala;
En im laigim wi olagijawan.

Det brabli kainbalawei en det brabli gudbalawei
blanga God jidan garram wi;
Yuwai, im jidan garram wi.

Ebribodi garra wokaran en tok gija:

God im gudbinji langa yu;
Yuwai langa yu du.



9. *Sing song.* 🎵🎵🎵

BIGININI TAIM GARRA STAT NA

10. *Maitbi sambodi garra gibit lilwan tok langa olabat
o maitbi detlot biginini garra go samweya blanga jidan
wansaid en olabat garra abum Sandei Skul.*

WED BLANGA GOD

11. *Det lida garra tok dijan preya:*

Dedi langa Hebin,
gibit melabat klinwan main
en meigim melabat sabi wen melabat irrim yu wed.
Album melabat blanga sabi yu brabliwei,
en blanga laigim yu mowa
en titjim melabat hau blanga meigim yu gudbinji
blanga ol detlot ting weya melabat dum,
langa Jisas neim. **Amin.**

*O, maitbi det lida garra tok det preya blanga det dei,
o speshalwan preya blanga speshalwan taim, laik Gud Fraidei
o Ista o Krismas (peij 126-128).*

12. *Sambodi garra ridimat stori brom det Holi Baibul.*

Afta ebri riding, det rida gin tok:

Irrim det wed blanga God.
Wi gibit theingks langa im.



13. *Det lida garra tok det mesij brom detlot Baibul riding iya.*

14. *Sing song. 🎵🎵🎵*

15. Maitbi ebribodi gin tok det Krid iya.

**Ai bilib langa Yawei,
hu garram ola pawa,
en im na bin meigim ebrijing
langa hebin en iya langa graun.**

**Ai bilib langa Jisas Kraiss,
det oni San blanga God.
Det Holi Spirit bin kaman,
en jidan langa Meri
en bambai Jisas bin bon.**

**Afta na, Panshas Pailat bin kotim im,
en deibin neilimap Jisas langa det kros,
en deya na imbin dai.**

**En afta, deibin pudum im langa det greibiyad,
weya ola dedbala pipul jidan.**

**Thrideistaim Jisas bin gidap laibala brom dedbala,
en imin gobek langa hebin,
weya im jidan raidensaid langa Dedi God.
Brom deya im garra kotim ebribodi;
laibalawan pipul en ol detlot pipul hubin dai du.**

**Ai bilib langa det Holi Spirit.
En ai bilib God bin meigim Kristjan pipul
jidan wan tjetj.
Ai bilib God na larramgo wi fri
brom wi nogudbalawei.
En ai bilib God garra meigim pipul
gidap laibala brom dedbala,
en wi garra jidan laibala olagijawan.
Trubala!**

TAIM BLANGA PREYA

16. Det lida gin pikimat sambala brom dislot blanga stat dijan preya taim:

God, yubin shoum pipul yu haibala pawa
deya langa skai,
**en yu larram pipul luk yu brabli shainiwan lait
ebriweya langa dijan wel.** (Saam 108:5)



Melabat askim yu Dedi,
blanga lukaftumbat ebribodi langa dijan kantri,
**en shoum ebribodi det brabli gudbala
en trubala wei blanga jidan.**

Melabat wandim ola pipul langa ebri kantri
garra sabi wanim yu wandim olabat blanga dum,
**en sabi yu na garram det pawa
blanga seibum olabat.** (Saam 67:2)

Yu jidan kainbala langa ola powan pipul
en langa detlot pipul hu abumbat adtaim,
en yu irrim olabat wen dei jingat langa yu.

Yu irrim melabat preya na, Dedi God,
dumaji melabat oldei trastimbat yu.

17. Det tjetj lida garra prei. If im wandim, im gin askim najalot pipul blanga preya du.

Wi garra prei blanga dijan wel en blanga wi tjetj
Melabat prei:

... blanga ola tjetj en tjetj lidamob ebriweya...

... blanga ola gabman bos en odinri bos ebriweya...

... blanga wi ronwan pipul olabat en dijan komyuniti...
 ... blanga ola sikbala pipul...
 ... blanga ola enibodi hu wandim speshalwan preya...

Afta ebri preya, tok:

Irrim melabat preya, Dedi God,
dumaji melabat trastimbat yu.

O

Dedi God, irrim dijan preya blanga melabat,
langa Jisas neim.

18. Wen det preya taim garra binij, det lida garra tok:

Wi garra prei mijamet na
 det preya weya Jisas bin titjim im wekinmen olabat:

**Dedi langa hebin,
 yu neim im brabli haibala,
 en melabat nomo wandim enibodi garra
 yusum yu neim nogudbalawei.**

**Melabat wandim yu garra kaman
 en jidan Bos langa melabat,
 en melabat wandim ola pipul iya langa ebri kantri
 garra irrim yu wed en teiknodis langa yu
 seimwei laik olabat dum deya langa hebin.**

**Melabat askim yu blanga gibit melabat daga
 blanga dagat tudei.**

**Melabat larramgo fri detlot pipul
 hu dumbat nogudbala ting langa melabat,
 en melabat askim yu blanga larramgo melabat
 fri du.**

**Melabat askim yu nomo blanga larram enijing
testimbat melabat brabli adbalawei,
en yu nomo larram Seitin deigidawei melabat
brom yu.**

**OI detlot ting na melabat askim yu Dedi,
dumaji yu na Bos blanga ebrijing
en yu garram detmatj pawa
en yu na haibalawan garram det shainiwan lait
tudei en olagijawan.**

Trubala!

19. Sing song. 🎵🎵🎵

*Maitbi abum kolekshan iya blanga larram pipul gibit mani
langa tjetj.*

JANDIMWEI PIPUL BLANGA GOD

*20. Det lida garra gibit theingks blanga ola ofring weya
pipul bin gibit langa God.*

Sambala pipul gibit olabat taim, en sambala gibit
olabat mani langa God thru dijan tjetj. Blanga
tharran na, wi garra gibit theingks langa Yawei.

Dedi God,
yu Bos blanga dijan wel holbit,
en ola gudbala ting weya melabat garram,
bin kaman brom yu na.

**Album melabat blanga abum taim blanga yu,
en yusum melabat mani en ebrijing gudwei,
dumaji yu na det brabli haibala God,
hu jidan olagijawan.**

21. Det lida garra kipgon preipreibat:

Jisas, yu jandimwei melabat brom iya na
garram det pawa brom yu Holi Spirit.
Album melabat bulurru yu brabliwei
en wek blanga yu,
dumaji melabat wandim ebribodi garra sabi yu
en preisim yu neim.

22. Ebribodi garra tok mijamet:

**Dedi God, melabat gubit miselp langa yu
jis laiga laibalawan sekrifais,
dumaji Jisas Kraiss det Boswan bin dai blanga
melabat. Amin.**

23. Maitbi laswan song. 🎵🎵🎵

24. Det lida garra tok dijan wed:

Wi gowei brom iya gudbinjiwei na,
dumaji wi sabi God laigim wi,
en wi sabi im San Jisas Kraiss laigim wi du.

Yuwai.

**Wi gowei brom iya gudbinjiwei na,
dumaji Jisas Kraiss im iya garram wi.**

From the Kriol Preya Buk


Copyright © 2021, Anglican Diocese of the Northern Territory.

All rights reserved.

The services are authorised for use under section 4 of the Constitution of the Anglican Church of Australia by the Rt. Rev. Dr Greg Anderson, Bishop of the Northern Territory, 2021. Text is based on Book of Common Prayer and its successors, such as An Australian Prayer Book and A Prayer Book for Australia; © Broughton Publishing, 1995 and its sources, or is the original work of the Diocese of the Northern Territory. The Diocese of the Northern Territory acknowledges with gratitude the generosity of Knox Broughton Publishing in allowing use of that material. Scripture passages, when quoted in whole, are from Holi Baibul: The Holy Bible in the Kriol language of Australia © 2006, 2015, 2018 Wycliffe Bible Translators, Inc.

For permission to reproduce material from this book, and details of conditions of use, write to the Anglican Diocese of the Northern Territory. GPO Box 2950 Darwin NT 0801 Australia.

www.ntanglican.org.au/resources



Anglican Diocese
of the Northern Territory

2021